



BIBLIOTHECA
UNIV. JYVÄSKYLÄ
CRISTOVIENSIS

kat.komp

586173

Mag. St. Dr.

OD KSIĘGARZY
POLSKICH
Z OKAZJI
WSPÓLNEGO JUBILEUSZU
600-LECIA
UNIwersYTETU
JAGIELLOŃSKIEGO
I KSIĘGARSTWA POLSKIEGO
PRZEKAZUJE
CENTRALA KSIĘGARSTWA
DOM KSIĄŻKI

KRAKÓW, W MAJU 1964

1925
684.
3.

No: 2. *Librata*


D. 330

CIVITATEM
GEDANENSEM
DECRETO
TRIBUNALITIO
LUBLINI
NUPER IN SELATO
NON TENERI
EXPOSITIO.

Z DUKLAW
BIBLIOTHEKI
XX CZARSTWA



GEDANI,
TYPIS THOMAE JOANNIS SCHREIBERI, SENATUS
ET ACAD. GYMNASII TYPOGRAPHI.



586173

I. Marg. St. Dr.

1965 D.35 St. Dr.

Blb. Jag.



os Praeconsules & Consules Regiae civitatis
Gedanensis, omnibus, quorum scire inter-
est, notum facimus: oblatum nobis esse die
decima quarta Novembris, anni praesentis
millesimi septingentesimi sexagesimi tertii,
ex actis judicialibus castrensibus Skarszeviansibus, per mi-
nisterialem, decretum Illustris Tribunalis generalis Regni,
Lublina feria tertia post festum Sancti Francisci Confesso-
ris proxima, anno Domini millesimo septingentesimo sexa-
gesimo tertio, latum, rigidum sane & atrox, quodque
nos anxios & sollicitos redderet, etiam horrore perfunde-
ret, nisi a iudicio latum esset, cui in nos, civitatem hanc
& in Prussiae civitates omnes, nulla est decernendi potestas,
neque fuit unquam.



Per constitutiones Terrarum Prussiae, & privilegium, quod vocatur, *instantiarum*, tum usum paullo antiquiorem, & Nobilitatis & civitatum, ultima a judiciis inferioribus ad judicia Regis aulica erat provocatio. Instituito ordinatoque in comitiis a. 1578. Tribunali Regni, tentatum ibidem, an Prussi novum hoc iudicium, tanquam supremum, pro judiciis Regis aulicis recipere vellent: quod cum recusarent, per constitutionem penes sua iudicia relinquerebantur, ut eos non Tribunal, sed ipse Rex iudicaret *). Hoc de omnibus Prussis generatim; ciuitatibus Prussiae & hoc servire poterat, quod ad Tribunal solum a judiciis terrestribus, castrensis, succameralibus & commissorialibus provocari posset, idque illis haud liceret, qui jure Magdeburgensi, Germanico & Culmensi uterentur **). In comitiis a. 1585 factum, ut Nuntii terrestres ex Prussia, nullo antea suorum Ordinum consulto, nullo a suis mandato, sed solum sua sponte, certis tamen conditionibus, Tribunal reciperent, utque sibi liceret, ad iudicia aulica redire, si quod ex provocatione ad Tribunal incommodum sequeretur, & salva in proximis comitiis declaratione, utrum a Tribunali iudicari, an ab illo recedere mallerent. Nulla tum de eo scripta Regni lex, comitiis irritis. Civitates in iisdem comitiis praesentes & a Nuntiis diversae, Regem orabant, ut cum privilegiis antiquis, & constitutionibus Terrarum Prussiae, quae adhuc in usu fuisset, ad iudicia aulica provocatio maneret integra, & id, de quo Nuntii a reliquis Ordinibus dissentirent, ad generalem Prussiae conventum remitteretur. Rex civitatum precibus ita annuebat, ut in sequenti Prussorum conventu, Ordines per suum Legatum certiores redderet: „Se assensum esse, ut Nobilitas Petricoviae in Tribunali Regni deinceps iudicaretur. Civitates, ut quae nullius alterius quam Regiae Majestatis cognitioni subesse vel possent, vel deberent,



„rent, in eo quo ante fuerint statu permanerent,, Tum Regi ex eodem conventu gratiæ agebantur, quod Nobilitatem a Tribunali Petricoviæ judicari consenserit, sed civitatum nomine addebatur: eas, quemadmodum jam in Regni comitiis testatæ essent, fieri id contra *jura, privilegia, libertates & consuetudines harum Terrarum*, ita etiam nunc testari, & pristinis suis juribus, libertatibus & consuetudinibus insistere, omnino constitutum habere. Cum civitatibus sentiens Mariæburgensis Palatinus, Fabianus Czema, demonstrabat, „quam periculosum, quam legibus & Prus-
„sorum libertati adversum esset, in alienum forum migrare
„& exteris legibus judicari velle,, Idem contradicebat, cum ex sequenti ejusdem anni ordinario conventu, primum ad Tribunal appellaretur, & civitates Consiliariorum consultum, seu *laudum*, sub sigillo Prussico obtinebant, cujus summa erat: „Posteaquam a multis immemorabilibus annis,
„vigore jurium, privilegiorum & immunitatum harum Ter-
„rarum, ratione instantiarum, hic mos observatus fuerit, ut
„Nobiles terrigenæ ab inclytis iudicibus terrestribus, ad
„Consiliarios harum Terrarum, ac denique ad Serenissimos
„Reges Poloniæ appellarint, illi vero moderno tempore, con-
„tra hujusmodi privilegia & immunitates consuetudinesque,
„loco ultimæ instantiæ apud Sac. Regiam Majestatem, no-
„vo & antehac inusitato modo, non tantum Tribunal in
„Polonia Petricoviense elegerint ac susceperint, verum
„etiam citra unversum & unanimem omnium Dominorum
„Consiliariorum ac Nobilium consensum, ab hoc conventu
„suas appellationes eo reapse direxerint, atque harum Ter-
„rarum publico sigillo, hoc tempore ad id uti voluerint;
„quod Spectabiles majores civitates, Thorunensis, Elbin-
„gensis & Gedanensis, in Consilio præsentis per suos Depu-
„tos & Internuntios, prouti & una cum minoribus civita-
„tibus in præteritis Varsaviensibus comitiis, ac nupero Ma-
„riæ-



„riaburgensi conventu jam factum esset, quoniam hoc diligenti instantia, sollicitationibus & admonitionibus haud amovere potuerint, pro se & nomine suorum Seniorum, adeoque omnium incolarum, adversus tale attentatum Nobilitatis, publice ac solenniter protestatæ sint, atque se non minus præsentibus modernis, quam successorum ergo præcustodiverint ac muniverint, quod talis novitas hisce terris ac civitatibus, in suis iuribus, privilegiis, immunitatibus ac consuetudinibus, his & futuris temporibus, non præjudiciosa aut noxia esse debeat, & quod ipsi in omne id, quod hic realiter attentatum sit, nequiquam consentire possint nec velint temporibus præsentibus,,

*) Vol. Constit. p. 332. tit. Prussy (II. 969.)

**) Vol. Constit. p. 327. 328. tit. Co sãdzic maia. (II. 964. 965.)

Ex hoc tempore, Nobilitas se a civitatibus seiunxit, ut ipsa judiciis aulicis omissis, ad Tribunal appellaret, civitates antiquam ad aulam provocationem retinerent. Sola pariter Nobilitas a. 1588. in comitiis, ad Tribunal constitutione admissa, ut tamen pristinam appellationem ad aulam repetere posset, si tribunal minus conveniret, & proximis comitiis mentem suam declararet, utrum in Tribunali perseverare, an ad priora sua judicia redire mallet. Tum alia constitutione modus descriptus, quo Prussi in Tribunali judicandi essent, causis civitatum nominatim exceptis (*). Serius Prussorum Nobilium secuta extra comitia a 1593. declaratio, quibus in itinere suo per Prussiam, Rex ad libellum sibi porrectum respondebat, licere ipsis perpetuo sub Tribunalis jurisdictione manere.

(*) Vol. Constit. p. 514. tit. Przyssapienie. Et tit. Obyczay (II. 1269.)

In

In civitatibus mutatum nihil, quæ suas, quibus usæ fuerant antea, ad judicia aulica appellationes servarunt integras, ultima in hunc diem ad ea provocatione. Neque Serenissimi Reges passi unquam, ut hæc judicandi civitates potestas sibi eriperetur, sed si quando Tribunal eam sibi arrogare conaretur, Rescripto suo intervenerunt. Nec Dominorum Cancellariorum defuit vigilantia, ut Regium jus tuerentur: civitatibus non tardantibus ad Regem confugere, ut promptum sibi esset adversus Tribunal præsidium. Tribunal vero ea fuit erga Reges reverentia, ut interpellatum cederet, partes & causam ad judicia aulica remittens, & si decretum festinatum esset, illud irritum haberet. Quare nullo exemplo doceri potest, civitates ejusmodi decreto tribunalitio, tanquam legitimo paruisse, aut Regem præcepisse ut parerent.

In comitiis a. 1623. Nuntii postularunt, ut Thorunenses, quod invectionem salis transmarini in Poloniam majorem impeditissent, a Tribunali judicarentur: quibus Regis nomine respondebatur, non posse Thorunenses, nisi coram judicio aulico, reos agi. In quo Nuntii acquiescebant. Vladislao IV. regnante, civitates Thorunum & Gedanum, harumque cives, aliquoties ad Tribunal citati ibidemque damnati, sed Rex interveniens & citationes & decreta irrita declaravit, Tribunali non obnitente. Nec minus Prussiæ Ordines a 1645. Regem orabant, ut civitates molestia exterorum judiciorum, Tribunal potissimum intelligentes, levaret, & fide publica, salvos conductos appellamus, ab injuriis ex latis in eas decretis, tutas præstaret. Memorabile est exemplum trium Gedanensium a. 1671. a Tribunali damnatorum, quos non solum Rex absolvit, sed etiam Ordines Prussiæ, in generali conventu, iis integram famam, honorem & securitatem asseriebant, declarantes,
decre-

decretum in foro non competenti latum, caventesque „ne
 „per ejusmodi evocationes ad fora non competentia, jura
 „& libertates harum Terrarum & civitatum, ordoque in-
 „stantiarum labefacteretur & convelleretur,, Lato a.
 1688. in Thorunum decreto tribunalitio, cives aliquot in
 publica via intercepti, Lublinum, ubi tum agebatur Tri-
 bunal, catenati ducebantur, capitis supplicium subituri.
 Sed Rex Joannes III. indignatus, viarum securitatem & suam
 judicandi civitates potestatem violari, captivos Thorunen-
 ses Varsoviam venire & liberos domum remitti jussit, to-
 tumque decretum ut irritum, obliteratum est. Movit
 a. 1742. Nobilis quidam, Konopka, eidem Thorunensi civi-
 tati, coram Tribunali litem, obtentisque in eos decretis
 duobus, Rex causam ad se revocavit, & Konopka, decretis
 irritis, remissus a Tribunali ad judicium Assessoriale, ibidem
 accusationem iterare & decretam expectare adactus est.

Memorata modo exempla ex pluribus decerpta,
 abunde docent, quam vano successu, actiones adversus
 Prussiae civitates in Tribunali institutæ, utque ex decretis,
 sive in actores, sive in judicium, fructus redundarint nulli,
 opera & sumtibus frustra factis, cum Regis auctoritas Tri-
 bunalis adhuc prævaluerit, simul leges antea citatæ, usu
 continuo firmatæ sint. Quo magis miramur, Illustre Tri-
 bunal Regni, contra leges, contra usum, nos & quosdam
 nostrorum civium, nuper citasse & damnassee, cum tamen
 etiamsi nostras leges ignoraret, ex Regni legibus scire de-
 buisset, civitates omnes, evocari ad Tribunal non debere,
 idque in postrema ordinationis tribunalitiæ retractatione a.
 1726. repeti, „ut neque partes, neque judicialia officia,
 „in quavis causa, quovis prætextu, citentur, sub pœnis evo-
 „cationis mille marcarum & pœnis personalibus arbitrariis.
 „Et ne Tribunal se in causas juris Regii ingerat, sed ad
 „forum

forum competens remittat, sub decretorum nullitate, (F).

*) Constit. a. 1726. Vol. VI. p. 434.

Demonstrato, Tribunali Regni jus in civitates non esse, tota nobis intentata actio corrui. Actor extra forum nos reos egit; iudicium non legitimum citavit; inquisitio, parte altera recte absente, instituta; decretum causa haud cognita, & a non iudice latum; denique poena imaginaria, nisi iusta poena dicenda, ad quam innocentes vi, carceribus, rapinis, caede cogendi sint. Et hic possemus calamum ponere, quia exceptio fori in iudiciis praecipui momenti est, & si probatur recte objici, totam actionem perimit. Cur non valeret eadem exceptio supra probata, adversus Illustre Regni Tribunal? Sed nonnulla de actore, de causa, de jure Magistratuum nostrorum in Nobiles, de poenis a nobis luendis, aliisque, non ut cum Tribunale in litem descendamus, a quo quam longissime absumus, sed in lectorum gratiam, forsitan in aliorum exemplum, memorare placet, breviter, & ut fieri poterit, perspicue.

Fuit Actor Magnus & Generosus Dominus Wilczewski, Nobilis Prussus ex Mariæburgensi palatinatu, Regius *Cubicularius* & *Colonellus*; ac a dicto palatinatu, iudex ad Tribunal electus, quique per tempus aliquod cum conjuge, quam ex Hollandia adduxerat, in hac civitate degit, debitor difficilis, in Magistratum contumax, violentus in vulnera & caedem. Credidit Illustre Tribunal, Dominum Wilczewski, quod iudex tribunalitius electus, quod Nobilis, Regisque a ministerio togato & militari, per leges Regni, non a Magistratu civili citari, iudicari & custodiæ mandari potuisse. Sed aliis legibus utuntur Prussiae, aliis



Poloniæ civitates. Non possunt per ordinationes tribunali-
 litias, iudices a tempore electionis, usque ad finem sui mu-
 neris, ab ullo iudicio judicari aut in ius vocari *). At
 lex hæc in Prussiæ civitatibus, quæ Tribunali non parent,
 haud viget, neque facile afferretur exemplum, Nobilem,
 quod iudex tribunalitius electus, ad Magistratum civilem
 citatum & ab eo iudicatum haud fuisse. Alias adversus Do-
 minum Wilczewski, ipsa tribunalitia ordinatio allegari posset,
 iudices eligi vetans, qui *processibus, condemnationibus,*
convictionibus juris & facti obnoxii sint **), cum Dominus
 Wilczewski, ante suam electionem, in iudicio damnatus, decre-
 to non satisfecisset. Nobiles etiam & qui Regis a ministe-
 rio, quando in civitatibus Prussiæ commorantur, non pos-
 sunt Regni legibus pro se uti, cum illæ in Prussia ejusque
 civitatibus per se non obligent, nisi Ordines Prussiæ eas suo
 consensu probaverint. Regni constitutionibus, æterna pax in-
 ter Regem Poloniæ & Ordinem Teutonicum, cui a cruce
 nomen, a 1466 composita, potior est, quæ permittit, ut
 delinquens in foro delicti, & contrahens, de contractu re-
 centi, in foro contractus queat conveniri: nullo inter No-
 bilem & civem facto discrimine. Sequuntur pacem per-
 petuam constitutiones Terrarum Prussiæ, quæ dum præ-
 cipiunt, ut Nobilis & civis, quisque coram suo iudice ordi-
 nario conveniatur & justitiam requirat, casus recentes &
 actiones criminales, excipiunt, „ut ad mentem pacis per-
 „petuæ, delinquens in loco delicti deprehensus & contra-
 „hens de contractu recenti, in loco contractus conveniatur,,
 Pacem perpetuam & constitutiones Prussiæ, cum cæteris
 civitatibus, etiam hæc civitas adversus Nobiles in hunc diem
 observavit, observabitque in posterum. Qualis autem in-
 telligatur ordinatio civitatis Gedanensis anni 1526, inter con-
 stitutiones Regni, in decreto citata, ignoramus, nisi signi-
 ficet constitutiones, dicto anno Gedani a sola Nobilitate im-
 petra-

H

petratas, quæ a. 1537 ab omnibus Prussiæ Ordinibus, ad antiqua jura retractatæ & anno sequenti a Rege confirmatæ sunt, a nobis paullo ante titulo *Constitutionum Terrarum Prussiæ* allegatæ. Constitutiones autem civitatis Gedanensis, a. 1570 in comitiis approbatæ, pariter in decreto memoratæ, sunt constitutiones *Karnkoviana*, a D. Stephano in Tractatibus portorii abrogatæ.

*) *Constit. a. 1726. vol. VI. p. 429.*

**) *Constit. a. 1726. vol. VI p. 418.*

Quod ad causam Magnifici & Generosi Domini Wilczewski, debebat ille civi nostro & mercatori, florenos ducentos & unum, a quo aliquoties frustra compellatus, deferabatur a. 1762 ad Nobilem & Spectabilem Dominum Præconsulem & Vice-Præsidentem Weickhmannum, Collegam nostrum perdilectum, a quo ante citationem, per amicum semel ac iterum monebatur, ut mercatori satisfaceret, abnuentemque, creditore urgente, ter citari jubebat, & in non comparentem, tanquam contumacem, lata sententia, ut certo die debitum cum sumtibus in litem præstaret, nisi mallet excuti, ut ex rebus captis venditisque pecunia redigeretur. Missus ad eum Domini Vice-Præsidis notarius quinquies, ut humanis verbis sententiæ parere persuaderet, qui sextum cum publicis famulis reversus, ut aut pecuniam, aut ex supellectile tantum caperet, quantum pretio suo, & debitum & sumtus in litem æquaret. Tum nova de his sumtibus contentio, quæ ita exarsit, ut dominus Wilczewski, arrepto ense latiore, pallasch alias vocato, notario alterum brachium feriret, ictu ad cutem penetrante, ut per dies aliquot dolor sentiretur, famulis graviora vulnera minitans. Nihil ergo supererat, quam in tutelam notarii & famulorum, subcenturionem cum aliqua militum manu mittere. Non



tamen cum sedatus Dominus Wilczewski, sed brevius scloperum in subcenturionem intendit, quod hic post magnam luctam, ipsi e dextera extorsit, ac sic salvus illæsusque evasit, Dominus Wilczewski vero, ut publicæ securitati prospiceretur, in militarem custodiam deductus, post tres circiter horas, ad preces Magnifici Domini fratris, honeste dimissus est, cum antea debitum, & sumtus in litem, nec non multa aliqua ob motas turbas, numerata in ejus hospitio pecunia, soluta essent.

Tantum de causa Magnifici & Generosi Domini Wilczewski, quam ipse longe aliter, in *manifestatione* adversus Nobilem Dominum Vice-Præsidem, ejus notarium & subcenturionem, actis judicii Terrestris palatinatus Mariæburgensis Stumæ exhibita, narravit, multis quæ falsa sunt additis, quamque in libello, Varsaviæ cum aliis communicato & per Poloniam sparso, repetiit & invidiose auxit, quasi in ipso, quia æs alienum dissolvere noluit ac prior vi & armis usus, omnis Equestris ordo, quem vere colimus, despectus, læsusque fuisset gravissime. Huic tamen ejus narrationi debentur, quæ in decreto leguntur, quibusque ideo non immoramur, ne videamur velle nos coram Illustri Tribunali, in causam ingredi. Ad *manifestationem* in *remanifestatione* Nobilis Domini Vice-Prætidis nomine, actis judicialibus Stumenfibus inserta responsum, & libellus Varsaviæ publicatus pariter confutatus est, omnemque rem uti gesta, coram judicio Regio Assessoriali exposuissimus, si Magnus & Generosus Dominus Wilczewski, injuriam, quam sibi a Domino Vice-Præside, aut a nobis illatam credit, ad Regiam Majestatem detulisset, aut ad nostram citationem, se judicio Assessoriali stitisset. Sed placuit ipsi, Illustre Tribunal Regni præferre, ubi nobis absentibus, dictis suis facile fidem se inventurum, & in nos, quæ vellet, obten-

obtenturum credidit, si modo efficeret, ut sua, pro universæ Nobilitatis causa haberetur, quod ipsi ex animi sententia successit. Petricoviæ enim infames judicati, Lublini plures pœnæ in nos decretæ, neque profuit, citatum a nobis Dominum Wilczewski ad iudicium Assessoriale, ut pœnam subiret, quam illi debent, qui ad alienum forum evocant, & Sacræ Regiæ Majestatis nomine monitum Tribunal, ut causa hac desisteret, a solo iudicio Assessoriali iudicanda.

De pœnis autem idem repetendum, quod supra de jurisdictione in nos tribunalitia diximus, cum, quod nemo diffitebitur, haud pœnam statuere queat, qui jurisdictionem non habet. Potestas quam sibi in nos Illustre Tribunal sumfit, minime est legitima. Reverentia, qua illud prosequimur, obstat, quo minus arrogantiam, potestatem solutam & dominationem appellemus, quæ nobis objiciuntur, quia Dominus Vice-Præses, contra Nobilem aes alienum solvere detrectantem, leges exercuit, & pro cive nostro, ut fas erat, jus dixit. Leges Regni, quæ hac occasione in decreto citantur & in quas peccasse, ideoque pœnas promeruisse arguimur, nobis scriptæ non sunt, ipsumque Statutum Thorunense, quod pariter allegatur, quamvis civitatis Prussicæ nomen præfert, non est statutum Prussicum, sed Polonum, in comitiis Regni tum Thoruni habitis scriptum; cautumque a. 1618. ne illud in civitatum Prussiæ injuriam explicaretur.

Minime autem rebelles evadimus, quando Illustri Tribunali non paremus, ut in decreto asseritur. Soli enim Regi fidem & obsequium juramus, in hunc solum rebellionis crimen committi potest, si fide & obsequio exuto, arma adversus Eum capimus. Tribunal Regni colimus, ut supremum in Polonia iudicium, sed cui nullum in nos jus est, quodque fidem & obsequium a nobis exigere nequit. Pœnæ
B 3 quæ



quæ irrogantur, sunt graves, multæ & variæ, etiam toti nostro collegio ignominiosæ, quas commemorare, parum, esset ex Illustris Tribunalis dignitate, magis convenit, cum toto decreto æterna oblivione delere. Unum tamen multæ genus non silebimus, quod Sacræ Regiæ Majestati injuriosum, & in Regii juris imminutionem cedit: Regis mandatum in præsentî causa ad Tribunal, mille; citationem Domini Wilczewski ad judicia assessorialia, pariter mille; absentiam nostram a Tribunali, duobus millibus; Rescriptum Regium, ne causa a Tribunali judicetur, totidem millibus marcarum Polonicarum æstimari: quasi nobis non liceret, gratis & sine multa, ad Regem Ejusque judicium, adversus judicem non legitimum confugere, Ejusque tutelam implorare, quando jura discrimen adeunt, & quasi ex Tribunalis arbitrio penderet, jurisdictioni Regiæ in Prussiæ civitates limites statuere, aut eam contra ipsius Regni leges plane abrogare. Ignorant ejusmodi ausum contra iura Regia superiora tempora, cujus primum exemplum nostris servatum, quod posteris, forsan non credituris, memorabitur.

Sed quæ & quantæ illæ poenæ sint, et subire, nobis & tribus civitatis Ordinibus, Illustre Regni Tribunal mandat, cum præter nos, duo tantum Ordines sint. In nos pariter & Ordines cæteros, nisi paruerimus, Illustrissimos Dominos Palatinos Prussiæ incitat, ut totius provinciæ Nobilitatem ad arma convocent, & adhibitis militibus Regni, ab Illustrissimis & Excellentissimis Dominis exercitus Ducibus, in auxilium mittendis, poenas a personis quibuscunque & bonis, cum civitatis tum privatorum, repetant. Verum uti in Prussia Dominis Palatinis, non nisi in publicum hostem, Ordinum consensu, omnem Nobilitatem ducere licet, sic interregno, ab Ordinibus judicia, quibus Domini Palatini præsident, adversus pacis publicæ violatores, quocunque nomine venientes, invasores, prædones, homicidas
insti-

instituantur. Superest pariter laudum interregni a. 1674, quo Dominis Palatinis executio decretorum Tribunalitiorum in Nobiles latorum, suspendere iungitur. Et Sigismundus I. in constitutionibus Terrarum Prussiæ, uni tantum Palatino, legitimam executionem regionum decretorum mandat, & si unus Palatinus cum sui palatinatus Nobilibus non sufficeret, ad se negotium referri vult. At decreti tribunalitii executionem, & unus Dominus Palatinus suscipere nequit, esset enim executio non legitima, quia agitur de decreto a iudicio non legitimo lato. Illustrissimi & Excellentissimi Domini, Duces exercitus Regni, cum per æquitatem animi, tum ob iuramentum religionem, nulla in nos submittent auxilia, cum obligentur, „ad occupationes bonorum quorumvis, tam officiosas & iuridicas litis, per decreta qualiacunque iudiciorum, vulgo condemnationes, „quam prætensivas, assistentiam militarem non addere, ac „milites immiscentes se iis, criminaliter punire, „*).

(*) Constit. Vol. VI p. 261.

Non satis est Illustri Regni Tribunali, omnem Prussiæ Nobilitatem & milites Regni auxiliares in nos excivisse, verum etiam, nisi decreto obtenperaturi, totam urbem proscribit, ut in Regno & provinciis, in fluviis & mari capi possimus, & Domino actori personas omnium ordinum, earum familias, bona, merces capere, personasque uti infames, coram quovis iudicio capite plecti permittit. Ergo instructis navibus, Dominus Wilczewski terras, fluvios, & mare infestabit, quem nos quocunque loco deprehensus fuerit, ut latronem & piratam, cum sociis, ultimo supplicio plectemus, & vim iniuriasque, nobis & civibus, bonisque & mercibus illatas, repressaliorum. quod vocatur, jure, in personis, bonis & mercibus vindicabimus, & initis cum Ordinibus consiliis, pro publica privatorumque securitate ac iurium nostrorum usu, nihil omitturi, etiam si extrema fuerint.

Cita.



Citationes Domini Wilczewski, decreta Domini Vice-Præsidis in eum lata, & contra ejus manifestationem, judicio Stumensi exhibitam remanifestationem, in quatuor angulis prætorii Lublinensis, per ministrum justitiæ, ad tubam cremata esse, patienter ferimus, quia fas & jus igne non abolentur. Est nobis justitiæ minister, suppetit lignum, neque tibicine caremus, sed non placuit, Magnifici & Generosi Domini Wilczewski manifestationem & libellum Varsoviæ & per Poloniam sparsum uri, alia Dominum auctorem manet poena, si publicum hostem agere coeperit. Quæ de eo actis Vice-Præsidentialibus inserta sunt, ejus memoriam servabunt.

Supereſt, ut in præſenti publica orbitate, Celiſſimum & Reverendiſſimum Dominum Regni Primatem & Interregem, inclytosque Sereniſſimæ Reipublicæ, tum Pruſſiæ Ordines, ſubmiſſe & obſervantiſſimè oremus, dignentur ſapientiſſime providere, ne inteſtina quies turbetur & homines prædæ inhiantes nobisque malevoli, decreti tribunalitii obtentu, nos & cives noſtros, tanquam proſcriptos invadere, bona & merces rapere, & in civitatis poſſeſſiones irruere audeant, ſed ut legibus conſiſi, ſub Sereniſſimæ Reipublicæ tutela, interregnum ſecure tranſigamus, donec futurus Rex, cujus electionem Deus quam feliciffime evenire jubeat, Regnum capeſſiverit. Quam Celiſſimi & Reverendiſſimi Domini Primatis & Interregis, ac inclytorum Ordinum gratiam, vigilantiam curam, benignitatem, nos, ut tota hæc civitas, cultu debito, reverentia, obſervantia, ſtudio, eoſque ſummo, venerari & proſequi, omni tempore laborabimus & annitemur.



Biblioteka Jagiellońska



stdr0024665

